

宋詩紀事補遺

宋詩紀事補遺卷之六十三

歸安陸心源伯剛父輯

方信孺

厲有

石門山

呂嘉積石浪相傳雙闕天開尙宛然成敗古來俱一
夢千秋何似老樓船

靈洲山

東南佳氣盛衣冠樓閣翬飛縹緲閒疑是落星灣下
見直須題作小金山

相對岡

海門高並兩峯寒大舶輕帆自往還安得百靈移一

島卻教塵世看三山

廣東通志山川略

清秀山

尋徧洞天三十六蒼靈獨閱此巖扉旋除野草開新
徑遮莫寒藤刺客衣歲月偶同題壁字烟霞似不放
人歸把茅欲作開山主已落瞿曇第二機

廣西通志山川

龍隱洞

南山山北北山南一洞中分路口三飛鶴叫雲聲自
遠懶雲慳雨睡方酣襄公淡墨留蒼壁太史高風拂
翠嵐百尺巖前清絕處道人先我著茅庵

同上

灘山雲崖軒

不用窮探費杖藜
隱然林壑挾城陴
曾遵月洞千巖上
更著雲霞一段奇
拂拭軒窗容俎豆
發揮泉石借聲詩
瞿曇頗似知人意
已約梅花帶雪移

古蹟略

浮邱山

碧海何年已變田
空傳雙舄舊時仙
乘風欲挹浮邱袖
同訪朱明別洞天

游伏波巖

歸舟多載小江春
重訪東巖舊屐痕
揮水峭崖猶有路
垂天怪石本無根
金華仙伯眞知已
薏苡將軍足

斷魂安得北山公可作倩渠移取向家園

再游龍隱巖追和陶商翁題

石門元不鎖巖屋本無基九夏花猶在千年樹倒垂
僧閑方定起客到每歸遲甚欲眠蓮葉沿崖讀斷碑

龍隱巖二首

曾榜武夷九曲何如桂嶺七星水石小容螭舫烟雲
長帶龍腥

愛山那惜走千回生怕前驅後騎催石上參差鱗甲
動眼中在處畫圖開驂鸞未辨乘風去浮鷁何妨載
雨來人事百年俱變滅祇應題字不塵埃

義甯華巖洞和純陽真人韻

巖前綠水無人渡
洞裏碧桃花正開
東望蓬瀛三萬里
等閒飛去等閒來

跨鶴曾來不記年
洞中流水綠依然
紫簫吹徹無人見
萬里西風月滿天

廖唐英

嘉定初知廣安軍撰廣安志

輿地紀勝第一百六十五

廣惠倉

屢豐多黍稌
先備富倉箱
豈但三年蓄
優爲萬室藏
君恩何以報
努力事耕桑

失咏

厲有

興地紀勝本軍有廣惠倉貯米三萬石知
軍廖唐英創三十敖作詩三十字以記之

都大華文監丞權府事之明年天子詔將直
禁近邦之人有以三獻瑞爲獻者曰雙蓮曰
歧麥曰九穗禾皆斯世之上瑞而萃於一時
人目之以爲盛遂采民謠集成歌頌曲三首
以對其美

缺二首

短短菰蒲州陰陰葭茨陂有斐嘉芙蓉雙蒂媚漣漪
如龍舒兩娥如沅湘二妃豈伊玉池種而乃生污泥
斑然爛雲錦襲人芳菲菲兩美諒必合佳人製爲衣

下承朝露滋上對夕日輝駕言折芳馨歸以遺所思

送長兒槃赴金陵典斛

幡幡六十翁碌碌三男子阿柴冠尙癡阿裕晬欲死
槃也年未強早爲貧出仕家庭所訓誨仕亦當念此
敬則能蒞官敏則能決事長如嚴師擇交必端士
僮亦人子耳勿以盛氣使只效龍伯高芳名播青史

遊大玲瓏小玲瓏

小玲瓏大玲瓏平林突起羣玉峰霜劍剪取碧瓏瓏
□斧鑿破青嵌崿自有此山生此石鬼削天巉更無
迹泗濱浮出瑞玉磬周廟橫陳古蒼壁蒼官儼冠劍

翠官披琅玕好風吹月來光動九琳臆守庵道人形
野倨白領方袍艸爲屨頗奇二士入洞來引向高亭
最幽處他山豈無石弄假不如真平泉馬鹿跡何在
南墅甲乙名灰塵說眞辯假無時了山童隔竹敲茶
臼

壽李雁湖

當年指李記生辰柱史疑爲法報身魚鳥泳飛南閣
曉風花經緯石林春手翻萬軸談無底曾著千年汲
愈新試看喬松霜雪後凜然一節照詩人

自卷朝衣濯雁湖勛名籍籍在黃樞時聞走卒稱司

馬猶有羣兒問大蘇赴隴尺書馳宦版起家萬石綰
麟符宵衣炯炯思黃髮正藉元勛出手扶

洵洵風濤卒未清便提小隊按行營一言刑省朝歌
盜單騎恩懷渤海兵豐德自應通綠籍長年何必飯
黃精勸公剩壓蘭英酒爲作涪川小太平

老駕青牛老子車行雲來去自紆徐精神健好充黃
野骨法清真貫玉廬六十二年康節詠五千餘卷玉
川書石林莫作盤踞計黃紙來看又詔除

鶴林集

尤煇

字百海號木石文簡公家孫年十九嘉定元年

戊辰進士仕至禮部尙書卒諡莊定

宋史附
九表傳

被命出鎮淮西至任一首

萬籟無聲意轉豪一揮出守敢云勞
臣心耿耿依三殿予髮垂垂有二毛
月黑星光懸帳幙夜深霜氣滿
弓刀披技素燭終宵坐待旦乘時
瀟灑

梁溪
詩鈔

徐範

字彝甫福建侯官人嘉定元年進士累官著作
郎起居郎國史編修官實錄院檢討官宋史有
傳

過太行山

茫茫遠樹隔烟霏獵獵西風振客衣
山雨未晴嵐氣溼溪流欲盡水聲微
回車廟古丹青老碗子城荒艸木稀
珍重狄公千載意馬頭重見白雲飛

澤州府志

楊志

字存誠龍溪人嘉定元年進士十四年知長溪縣百廢具舉遷廣州通判

綺川亭

一川綠淨滄浪水千朶紅稠菡萏花
病眼紛紛何所似江天落日散餘霞

廣西通志勝蹟

石澗龍首山

殘年仍置閭五日恰逢春携酒口獨賞敲門僧不喚
雙榕如拱立萬井故橫陳僧舍少盤薄元規塵上人
福甯府志

黃夢得

夢得臨川人嘉定元年進士官都提督

擬虹亭

父老橋邊問我翁笑談能辦濟川功水光碧界一千
頃晴影紅翻二百弓好與諸公來翫月方知此地亦
垂虹乘風似有驚人語高枕滄浪放眼空

江西詩餘

張自明

自明字誠子號丹瑕南城人嘉定元年進士官
宜州教授攝州事後爲衢州教授江陵戶曹從
朱陸明性理尤精先天之學與戴石屏嚴華結
詩社學者稱丹瑕先生

觀邸報

西風颯颯雨瀟瀟小小人家短短橋獨倚闌干數鵝

匹一聲孤雁在雲霄

江西詩徵

白龍洞

白龍洞口白龍臺一俯南天眼豁開蒼壁漫題三數
字後人還笑我曾來

丹霞巖

玉玲瓏外玉崔巍曾與三賢識面來自有此山纔有

此遊人于此合裴回

廣西通志山川

雲崖軒和方韻

萬里風煙倚瘦藜湘南曾自一登陴雲崖知在宜山

麓月水傳夸古洞奇四字丹書無夢見千峯蒼玉有

誰詩門前繫馬松陰下鴉背斜陽影屢移

廣西通志勝蹟

棲霞洞

玉洞沉沉鎖碧虛月華曾伴日華居刀圭影觸金丸

彈蟬脫形留錦鯉魚舊隱已荒三徑草仙人忽授數

行書丹霞已有棲真處十里松風可跨驢

同上

與定武趙蔚游華景洞

拂破蒼苔覓舊題五言覓得晚唐詩
岩光人憶遺名好華景天開一段奇
鐵鎖掣關躔壁壘玉梯穿路透瑤池
古心來展開游戲慙愧平生華子期

游水月洞

癸水江頭石似浮銀河影裏月如鉤
無人弄杵看蟾兔有客乘槎訪斗牛
自古鵲橋傳七日何年桂子落三秋
金輪待欲長無缺玉斧仍須妙手修

游朝陽洞次孫機宜韻

綠野年來喜有秋行春到處小淹留朝陽亭上初披
霧水月巖中更枕流竹徑不容周俗駕桃蹊還泊晉
漁舟遨頭自愧非元老濫摠帥干乏壯遊

再次前韻

乘輶初至憶前秋豈意持麾尙此留立屋得僧成宴
喜遊山如謝欠風流勸酬同把菊花盞來往自操蓮
葉舟向晚洞門煙漸鎖祗應歸興更夷猶

右刻在水月洞次孫機宜韻下細審之有維字
疑是張維作然無年月可證文載作自明詩姑

附于此

廣西通志金石

黃埒

臨川人嘉定元年進士

壽徐倉使

四明山水遠且清
秀氣鍾作千人英
南州高士真濟美
天地正粹涵中襟
學問淵源派伊洛
文章典麗鏗鼗
射策丹墀壓羣彥
聲名一日蜚玉京
粵從臚仕久揚
歷政事所至皆有稱
讐較芸編上羣玉
蕃宣茗水騰
頌聲凝旒簡
眷異儔正追班
文石煥郎星
清規屹立朝
譽振儒術
旣行邦計
羸論思
猷納眾所矚
其奈宵旰懷遠
氓咨諏出
檻澄清轡
肅持庾節
調列城

視時歛散民食足觀風按察吏膽驚側聽賜環駟騎
速行看荷橐天衢亨節過清明纔六日欣逢吉夢叶
長庚和氣卻隨春氣足福星還並壽星明已聞好語
日邊至莫辭爛熳傾疊觥自慙小草依松栢臭味相
投意甚真矢詩不但爲公壽八荒壽域更躋民

截江網

章樵 厲有

題鏡紅亭

屈曲蓮汀隱復明西湖奇觀到南屏萍花巧綴玉鈿
碧山翠淨涵螺髻青隋女啼粧羞缺月秦娥望幸對
明星主人約束當樽俎未放騷翁眼獨醒

昌化志

劉用行

字聖與泉州晉江人嘉定元年進士官永州零陵令改巴陵尋遷道州通判知桂陽軍端平初召爲太常寺主簿守安慶嘉熙二年起知潮州改知贛州卒于官

遊浯溪

祿兒豈解傾唐祚□□□□兩翁蜀道至今遺□
□□□□底照孤忠摧風溜□□□□地回天剋
復功人□□□□盡不知磨盡幾英雄

湖南通志金石略

鄒恕

泰甯人嘉定元年進士

回龍嶺

蘭若半空中雲山第幾重瀑流千丈練鶴宿五株松
曉雨禪房黑霜林木葉紅懸崖回首望歸雨過前峯

福建通志山川

劉厚南

字子固慈溪人嘉定元年進士六年國子博士

兼祕書郎

梅莊春閒

最喜逍遙泉石間幽居四面繞青山苔迷荒徑人稀

到花厭重門晝自關古刹風傳鐘磬遠平疇雨過枯
棹閒荷鋤手摘園中笋配酒三杯壯客顏

李劉

號梅亭江西崇仁人嘉定元年進士官至寶章
閣待制長于四六箸有四六標準

賀舍弟新得子

早來乾鵲噪簷楹報我庭階玉樹生告白祖宗知積
慶喧傳奴婢摠歡聲遠增阿大中郎喜足想殊常散
騎情王獻之帖云佞新婦得雄散騎殊常喜也點校六經留汝讀吾家元
不蓄金籊

賀晚生子

商瞿五十子何遲佳氣充閭慶可知喜溢麟生天上
日夢回虎墮月中時犀錢賸送沾佳客麝顆輕塗付
侍兒英物從來聲自別試啼容我一聽之

賀晚生子

蘭玉森森天下奇靈椿猶自長新枝從來老蚌珠生
晚豈是長庚夢到遲標格銀蟾光皎潔精神秋水碧
漣漪玉皇案吏家聲近伫看追蹤入鳳池

賀生第二子又喜領薦

君家蘭玉滿庭除尤喜徐卿第二雛方遂鵬程收鶚

薦又符熊夢獲驪珠史山孕秀頭顱別秋水爲神骨
骼殊況有義方嚴訓在早看騰達上雲衢

截江網

壽漕使

金床玉兔歲重逢初度占星尙劔東鐵馬未容耕渭
上木牛且合漕關中雲屯營壘樵蘇飽雨足郊原菽
粟豐更與坤垠開壽域皇華一笑與民同

慶劉教授

萬里秋風生桂枝麒麟墮地有誰知摩空早奏甘泉
賦取勢猶歌泮水詩好是桑蓬浮喜氣正栽桃李助
清詩銀袍爭願公衣鉢應指湘山无量師

代賀皇太子生日詩

寶月重輪麗虎闌祥煙葱鬱繞黃麾九秋沆碭平分
日萬國元良初度時禮樂詩書俱習慣聖賢仁孝況
生知入荒壽域從今啟請爲豐年上玉卮
朱芾皇皇問寢門青宮喜氣滿乾坤江清淮晏干戈
息淵默雷聲七鬯尊端冕常年親舉禮遠庖此日剩
明恩直將三代齊長久願聽長沙賈誼言

賀參政

海山俯視百川東中有明堂一柱隆兩社直從平地
到寸心元共老天通管曾功烈非軻志堯舜君民在

尹躬壽國端須壽君子願將箕翼等延洪

東府西樞紀誕辰非煙郁郁更紛紛共知崧岳生申

伯競把旃檀壽卯君

東坡壽子由詩持是壽
卯君子由乃已卯生也燮理已

成六月雨經綸更作八荒雲齊安卽是安天下敢爲

先生誦所聞

慶尙書八十

寶唐佳氣夜充閭八十尙書古所無勘破趙州行腳
案展開老子出關圖五房孫各了官事千戶侯封食
稅租若問磻溪釣漁叟先生應道沒工夫

壽成都黃副帥

王正初生七葉冀斗牛閒氣出延平次公恰恰九年
最叔度汪汪千頃清濟北一編煩展究劒西半壁賴
生成且傾江漢朝宗水濟彼公堂薦壽觥

玉帳公弓應六蓬辨香遙遺賀南豐捫參以手誰憐
汝居井之眉我倚公壽域八荒隨氣轉醉鄉五福與
民同老蟬不是青冥腳也願追隨龜鶴東

壽瀘帥楊尙書

八年黃伯穎川政十載武侯瀘水功還向碧幢揆初
度但愁綠詔啟元戎生從峻極崧高降壽在慈祥豈
弟中今歲添盃添福祿膝前文度伴仙翁

尙書清稟秋天杳吉夢元占玉燕飛南定三軍須北
定西歸九戩合東歸壽星出丙光丹極華蓋承辰近
紫薇要減汾陽聲樂半直須揚濯入黃扉

慶桂帥經略

江漢浮浮炳地靈參旗井鉞壽星明庚寅初度周而
始戊己連營靜不驚山上印成龜左顧月中桂共免
長生公堂遙想稱觴後便報天階取履聲

煌煌昴宿正開冬日馭高躔龍尾宮賚說須知應天
策留蕭暫委守關中赤雲決勝三邊壯白日褰晴五
穀豐六十州人開壽域碧幢一笑與民同

許應龍

字恭甫福州人嘉定元年進士調汀州教授累遷國子司業祭酒權直舍人學士二院官至簽書樞密院事贈資政殿學士銀青光祿大夫宋史有傳

贈鄭樞密

邱壑方將窈窕尋肯貪斗印耀黃金幾頒中展留行詔莫返元樞勇退心紅旆分藩雖足樂丹誠戀闕自難禁浮雲出岫知無意祇恐蒼生望更深

自歎

僕訴無衣婢訴飢老妻終日不開眉十年待得齊瓜
熟又似齊瓜未熟時

以上見東澗集

林棐

浙江平陽人嘉定元年進士紹定四年以朝奉
郎知廣德軍爲政寬簡奏蠲兩縣連租二萬五
千餘石

宿橫山禱雨

寸心憂國願年豐曉挈楓香入翠峯幸有一壇瞻斗
象豈無尺水起淵龍松風不住雨聲碎嵐霧常隨雲
氣濃願覓天瓢一滴水三符需夢慰三農

廣德州志

上官渙酉

字元之邵武人嘉定元年進士寶慶初知眞州
兼轉運判官端平三年後知池州兼江東提舉
累遷大理卿寶祐二年進集英殿修撰

小殊山

雙岫西南聳東山小更殊形分閭嶺秀名自隱翁呼
日映光濃淡雲深色有無須憑恕先手畫作遠山圖

福建通志山川

黃汝嘉

嘉定元年知江山縣從祀岳武穆祠

騎石山

江城樓閣闌嵯峨如此隨風燕雀何古木望中松柏
少好花開處杏桃多徐殷舊宅僧爲主褚氏閒亭鶴
占坡花落花開今古事青山無語野樵歌

一亭平倚此山巔展盡郊原極目天高下樓臺微帶
雨參差樹木遠含煙品題物象詩聯軸管領江山酒
滿船官冗不妨登覽興塵襟到此自翛然

江山縣志

江邦佐

嘉定三年以武節郎知潯州

遊南山

南山特地森奇峯嶙峋怪石蟠虬龍巨靈夜半擘山
腹幻出巖竇相玲瓏陰陽石罅滴瓊液拂拂洞戶生
天風宸章炳煥神物護斷碑零落蒼苔封稚川飛昇
歲月久丹竈灰冷留遺踪曉猿夜鶴自驚怨朝嵐夕
靄常溟濛我來依寺困朱墨欲尋勝概嗟無從公餘
乘興一登覽萬家獻狀來無窮金莖濯露素秋節清
涼不與人閒同憑虛孤嘯岸巾幘收拾爽氣歸胸中
俗駕自憐難久駐還作冷然御風去太息眞仙杳不
逢碧雲暮合空凝竚

廣西通志山川

胡衍

會稽人嘉定中知臨海縣

嘉定二年秋重游洞霄

餘杭泉石久幽探淨拂衣塵入翠嵐九鎖山門雲上
下一峯天柱殿西南元封舊事無人記德壽仙游有
客談痛飲丹泉臥元石松風滿耳夢初酣

洞霄詩
集卷四

黃甲

江西大庾人嘉定三年鄉解

九疑山二首

宇宙纔分便有山茲山戢戢序成班重華遠矣遺風
在擬似相從揖遜還

二妃千古恨難刊不謂南巡遂不還空使湘江江上竹至今猶染淚痕斑

羊權山

聞道仙人綠萼華曾來此地訪仙家青衣數十隨行處環珮紛紛香霧車

玉琯巖

橋山往日葬衣冠玉琯深藏在此山料得當年十二牧也隨龍駕到其閒

湖南通志山川

鄭晦

歙人嘉定三年教授楊州

浮丘祠

青天志欲騎長虹半生雙眼四海空題詩遠寄廣成
子筆力萬仞搖崢嶸前年鶴背乘天風翻然回首江
之東束書歸隱黃山中山中偶遇浮丘翁人生寰宇
總過客呼酒澆愁醉李白十畝耕雲種紫芝酬詞擊
石嫌春窄招浮丘乾坤到處堪遨遊丈夫有志身狗
國逢時無意干封侯皇天恩澤盈遐陬忍眎吳楚森
戈矛黃金白壁豈足尙我愛文章有官樣長篇欲向
庵壁題憑陵豪氣三千丈住庵道人請書壁禿毫轟
雷停不得飛香灑雪淋漓濕一夜寒風瘦蛟泣

黃山志

王大烈

晉江人嘉定四年進士

賀人生女

祥光子夜都明徹
婷婷仙子來仙闕
精神玉雪比不
如猶帶蓬萊秋夜月
郎罷今晨莫世情
文粹閩人呼子爲田父爲
罷那知便不顯門庭
我來只誦香山句
不重生男重生女

王氏螟羅氏子

庚星一點光無涯
日來飛入江東家
江東江左舊聲
氣叔氏得之真
差事歸來瑞光凌
九虛叔氏喜亦盈

眉鬚家人驚起偏物色袖中卻得真英物螟蛉須信
逢螺贏莫惜丁寧長類我他年解有速肖時會振風
流舊江左

賀人生子

蚌胎未老出明珠或表高門慶有餘我病阻爲湯餅
客人言的是鳳凰雛磽磽頭角奇男子袞袞公侯大
丈夫寄語王渾防跨竈阿戎清賞只須臾

盡道生來骨相奇若非鳳種必麟兒幾年仙李蟠根
固一顆蟠桃結子遲岐嶷兩全真鮮克之無二字已
先知徐卿衣鉢今傳取袞袞公侯看異時

賀生子索盃

小童門外走雙壺知是君家毓掌珠前語果然符老
蚌這番不可學乾烏且將詩句爲君問還有婆杯惠
我無莫怪明朝東閣地要教泥醉索人扶

截江
綯

賀生次子

昔也惟珍一角麟如今雙璧更驚人今朝蘇子晉朝
陸許事從初又一新

賀生次子

纔入新秋節君家又得珠石麟天上種丹鳳穴中雛
喜羨徐卿有休誇伯道無他年雙析桂攜手上雲衢

同上

許伯翊

同安人嘉定九年以承事郎知仙遊縣終福州府通判

訪景山

奉陪南極老來慕北山名鑿石濃書墨流觴款敘情
問誰挹仙袂笑我縛塵纓知是龍門客終難卧孔明
仙遊縣志

張礪

字渭老一字敬夫號松山羅源人嘉定四年進

士由檢點贍軍激賞酒庫所主管文字遷吏部
架閣厯官兵吏禮刑部尙書端明殿學士官至
參知政事封長樂郡公致仕卒贈少師

聞兄衛竄作詩寄之

飛旆翩然拂曙涼都門餞送集冠裳竄鄉此去嗟予
季忠國由來留異芳賈誼未云時不遇酈生自謂我
非狂橫江一網空朝市何物充庖薦廟廊

羅源縣志

范師孟

錢塘人嘉定中鄉貢進士嘗作北高峯感夢記

題北高峯石松

根蟠巨石四時陰陌上香塵豈敢侵不但詠誇奇異
跡也須珍重歲寒心

靈隱志

莊夢說

泉州人嘉定間仙遊縣尉

次許宰普惠院祈雨韵

華鯨呼客響修廊杖履來遊蘆蔔堂
宰堵擎天光繚繞遠山排闥翠昂藏
高僧宴坐鬚髯古縣尹新題詩
句香喚雨雨來端有驗會看行旅不齎糧

興化府志

宋詩紀事補遺卷六十三終
男內閣中書樹屏校

宋詩紀事補遺卷之六十四

歸安陸心源伯剛父輯

陳元晉

元晉字明父崇仁人嘉定四年進士初授雩都尉遷知福州融州累官邕管安撫使嘗建漁墅書院有漁墅類稿

梅

吾敬林隱君終老梅花鄉孤山足佳處不願白玉堂
古來貧賤交富貴渠相忘歲寒誰苦心搖搖桃李場

竹

吾敬王子猷傲俗獨愛竹行止必與俱情義均骨肉
雲龍求友心上下亦相逐彼哉絕彝倫乃戒桑下宿
遊羅浮寶積寺

晴峯膏秋客遠騎駐春腳長風載之游清月此旅酌
眼高天圍小語暖雲氣薄神仙邂逅親導客以笙鶴
再用前韻

半生夢羅浮世事縛兩腳仙泉有誰何生客那得酌
君詩挹其腴水味從此薄清遠天所裁望極南飛鶴
壽懶庵趙先生

更生青藜杖長吉古錦囊豈無芝蘭馨終少蒹葭霜

精深師友漸磨琢金玉相凜此宗姓傑高掩漢與唐
曩時吳畏齋槃槃極宏毅今時葉水心表表負經濟
公游二老閒聖處心獨契人物方眇然甚矣夫子似
皎皎疇昔心睠焉本根計一鳴驚萬咽獨醒閱眾醉
勇指非種鋤有膽竟成事彼哉稱國師千載有餘愧
醫國藥萬金補袞線五色誰令落江湖刺史六百石
眾萬溝壑瀕援手公一力平生富青州關心豈官職
嘉師固秉彝祥刑盡生德惠文恣彈治此意誰復識
雨露旣天覆刀劍亦俗革活人不言功所願長我國
王氣鬱東南兵塵莽關洛事會豈有極祗恐元氣弱

折衝尊俎餘欠著一謬謬如公胡不歸儒用魯何削
垂弧正大夏明炳肖火德仙源毓英靈帝賚扶社稷
恩波溢西江釀作壽觴碧一飲千斯年福與宋無極
書生棲大廈燕賀愧無從嵩高乏嘉頌何以祝我公
一節貫歲寒願似南山松下有千歲苓嘗許氣味同

和馮眉州九日無酒韻

蜀日曠曠風淒淒有美人兮愁楚羈白衣不來負佳
節士窮使我增歔歔錦韉屢踏秦關月寶刀尙染猩
紅血尋思往事玩浮雲目送孤鴻互明滅醉鄉廣大
無何有無事惟當學犀首不應來弔獨醒魂邈嫌閑

卻持螯手吾儕臭味草木同但須多植寒花叢遇花
開時卽重九天豈教人樽屢空

胡文昌和東坡子由彭城月詩并錄澹庵新
川以所和見示索和

澹庵眼似坡仙高眇視軒冕如秋毫忠臣要作社稷
計那知平陸生風濤當時蓋亦輕餘子富貴轉頭眞
逝水汗青不朽姓字香百世聞風尙興起函關正要
封泥丸金陵王氣開龍蟠一書乞借尙方劍搢紳環
睨心爲寒要扶鑾駕還都汴鼎鑊在前顏不變低頭
辨了著南冠歛手笑還丞相板飛鳶跼跼古錦山氣

老益壯窮益堅銀河流空月照地肺腑洞作冰玉看
緬懷坡仙亦大好詩比離騷興香草持杯滿滿賀索
娥嶺海百年逢二老聞孫趾美德不貧清文高節猶
前人尙留佳話重拈出只慙授簡梁園客

和蔡鐵窗韻

鐵窗詩價遠應是到雞林修月有妙手伴雲無出心
調高追郢曲意古和虞琴觸境勿多語希聲是大音

嚴陵市

暝色低平野霜風放霽天買杯逢竹所索句立梅前
山曲雲歸寺溪寒水帶烟茅簷聽殘雪愁絕擁衾眠

王推官載酒來會於逍遙堂

路入煙蘿杳靄中
良宵一笑美人同
壺觴盡攬平湖月
絃管時飄別岸風
三宿未忘緣境勝
一燈相對坐詩窮
姓名要共青山久
看取當年玉局翁

得主管仙都之命

頭銜清甚管仙都
吏責全無出有車
老去心情酬應懶
閒來親友往還疏
每嗤人作囚山賦
莫勸儂通光範書
只把窮愁博強健
世間得失本乘除

擊毬口號戲陳統制

築場千步柳營東
樽俎精神坐折衝
星彈流空驚過

鳥霜蹄追電捷遊龍身輕鞍馬人如畫膽落猩鼯穴
已空歸去翠眉環玉帳釵兒多乞錦纏紅

贈劉賢良

十二書言天下事氣如蕢直語加適誰當心恥四郊
壘子獨眉攢萬國愁刺手拔鯨何倜儻劇談捫蝨自
風流悠然且作新豐醉定有人能說馬周

謝童帥幹送滴酥

滴成詩句巧相粘料得堂深凍未忺翦水染雲天上
手何因得見玉纖纖

甯都上元

一覺翛然已五更
窻橫梅影月偏明
年時記得嬉遊

罷猶爲梅花夢不成

以上江西詩徵

別玉笥何鍊師

東山楊先生有序贈之

軒軒黃冠師
胄出水曹後
流風尙詩癖
聖處坐鑾透
蹇裳紅塵外
心賞山水秀
渾融入芒端
字字遺氛垢
雲霧巧裁縫
冰雪工刻鏤
編成著山巖
光怪射牛斗
以上見漁墅類藁

呂午厲有

鳳凰臺

古臺曾說少年游
彈指驚嗟歲月流
山似三神浮碧

海城如一虎臥崇邱鳳皇去後遺陳迹白鷺來時認
舊洲但得風寒無罅隙江湖舉目不須愁

景定建康志

鄭芝秀

芝秀字雲瑞號月山貴溪人嘉定四年進士終
翰林院學士著有月山集

芙蓉峰

芙蓉秀插最高峰上有仙臺近碧空不憚攀蘿登絕

頂俯看塵世一樊籠

江西詩徵

李華

字實甫崇安人嘉定四年進士調連州法曹紹

定閒除太府寺主簿直華文閣知汀州端平二年轉廣東轉運使進直徽猷閣知潭州兼湖南安撫使

戊寅入嶺丁亥上元遊碧落洞

乳床奇詭鑑清漣碧落真人古洞天十載南遊纔一到不訪重補到難篇

謹案詩刻在英德碧落洞戊寅爲嘉定十一年是時爲州司法丁亥寶慶三年也

廣東通志金石略

李韶

福清人字元善號竹湖彌遜曾孫五歲能賦梅

花詩嘉定四年進士歷太學博士上封事諫濟
王獄忤史彌遠勾外通判泉州擢知道州紹定
四年知泉州端平元年拜殿中侍御史官至翰
林學士知制誥諡忠清與杜範齊名目之曰李
杜

遊虎邱

望中平坦獨崔嵬根跨滄溟浪打回不是巨靈潛擘
與祇應蓬島暗飛來經壇烟染千株石丹井雲封萬
古苔翠色高通蘇郡內滿城清雅絕塵埃

虎邱志

鄭會厲有

字文謙號亦山江西貴溪人少遊朱晦庵陸象
山之門與族叔芝秀同登嘉定四年進士官禮
部侍郎爲史彌遠所忌引疾歸卒諡文莊著有
亦山集

梅雪堂

素心甘澹泊秉節性貞固開堂撫垂雲徘徊閱嘉樹
孤根倚絕壁清光更回互生平鍊石腸不受纖塵污
念結歲寒盟相依共遲暮

將抵家遇雨

過車偏值雨連天疲馬難支又上船樹杪鴉兵催急

棹渡頭漁火鎖寒煙論心知己期將近念子慈親望
久懸自笑歸裝無一物就中強半是詩篇

白衣寺

白衣古寺瞰江流隔斷紅塵不記秋深羨老僧心入

定禪房花木四時幽

以上江西詩徵

王呈瑞

字莘夫江陰人第進士辛未南省第九人終太

湖宰著易膚與楊端叔靳更生三人皆以文鳴

君山浮遠堂

萬室東南裏炊煙落照黃山腰圍堦闊沙尾刺江長

好景終然遠浮雲轉已亡幾多加湛輩今古一淒涼
江陰縣志

楊幼輿

廬陵人嘉定四年知融州

龍潭禱雨記事

戴星躡履謁靈祠俯瞰龍宮映綠漪鏡漾清潭三百
尺峯巒環繞聳蒼碧道傍野老忽長噓昔也原爲安
民居嫂笑小姑借梳掠插梳橫耳走送邵姑嗔大嫂
方作喧迅雷陷宅變深潭是時水底猶存屋入夜人
聞尚眷栗歷年旣久已無形神龍守護稱安靈呼吸

風雷作雲雨爰與人閒茂禾黍大觀邦人因禱祈沛
然甘澍滿郊圻人皆懷惠頌靈迹侯爵初封助懽懌
近時響應達朝廷屢頒顯號莫與京我來假手三逢
夏每遇乾枯叩祠下靈湫一滴漲塞天衝倒天河頻
有年終始恩波如一日躬趨端拜感何極肅容親炷
一瓣香稽首皈依謝休祥潭心水面跳雙鯉已覺威
靈示人喜南遊行矣歸故鄉更願神兮長久與民作
豐穰

遊老君洞

陰陽無端更去流世閒盛福難全收古人一麾恥外

郡今我半刺來邊州到官未久出按縣滿眼搖獐森
戈矛誰知造化默相補玉融山水何清幽蒼崖翠壁
老君洞健非巧宦能兼遊萬歲乳成滴白柱一卷溪
畔眠青牛真仙遺跡覽不盡散髮坐石臨清流灑然
形質已自失欲釀溟滓觴浮邱襟懷浩浩隘八極身
外何物非輕漚數聲長笑下山去幾點白雲天際頭

柳州府志

劉光祖 厲有

遊荊州上泉山

上泉山下石叢叢小似飛來天竺峯草木自腴巖自

秀幽姿不肯入屢中

碧玉潭深黃玉花蓮經聽徹便爲家憑君爲我頻膏

雨長使村村足稻麻

湖北通志金石

女媧山

女媧山下少人行澗谷聲中一鳥鳴

輿地紀勝

謹祐

字自求號桂舟又號服耕子世居南豐之西曰
瞿村幼厭舉子業參詩於贛詩人蒼山曾原一
遂青于藍識者謂律詩至祐中興古學古貌與
世少可窮經博古老而不衰生於嘉定癸酉年

八十六以布衣終所著有桂舟雜著自知集桂舟歌詠三傳朝宗史漢韵紀古書台轍

勸農曲

山花笑人人似醉勸農文似天花墜農今一柸回勸官吏瘠民肥官有利官休休民休休勸農文在牆壁頭官此日民此日官酒三行官事畢

江西詩徵

劉夢才

江西安福人嘉定六年解試

送胡季昭謫象州

紹興寶慶百年餘古往今來說二胡論事直須彈懇

切立朝端不忍阿諛兩賢幸屬吾州有萬事何曾公
議無象郡新甯下口詔九重天子正儀圖

見象臺
首末

邢凱

字廷舉江西武甯人嘉定七年進士紹定二年
召試館職除秘書省正字官至吏部侍郎致仕
歸築巖閣書院著坦齋通編

送楊司戶

德大拙於用數奇真可憐民曹清到骨雞肋受尊拳
謾失塞翁馬終還子敬羶桂林羅雋士安穩泛紅蓮
辛卯上提刑平寇歌

陳公籌策今子房衣綉持斧征南方親督貔貅效深入
悉孛狗鼠無留藏二帥宣威旣電擊羣校賈勇爭
奮揚束身來降三百寨所餘一二猶陸梁平固恃險
連百丈僭擬官號熊與張一朝駢首俱就縛是謂擒
賊先擒王捷書夜至連清晝不聞傳箭赤白囊駸駸
良民皆安堵憧憧道路多行商妖氛頓掃賣刀劒祥
風初扇催耕桑紹定四年調玉燭薰蒸六合爲金穰
第功行封先指授淩青邈紫將翱翔元戎煌煌賜紫
軸裨將一一露龍光振旅歸來神螺岡笳鼓競飛聲
洋洋響弓載戢綠沈鎗旄頭星滅漢道昌雅宜飲至

滿浮觴細柳煙籠春晝長

上丞相平淮頌

平淮夷誅叛賊也李全背叛窺伺廣陵上命將
討之旋即授首淮甸肅清普天同慶故作是頌
鋪張宏休

皇矣聖宋立國以仁兼愛南北爰暨介鱗蠢茲逆全
假義俅臣給以餽餽列之簪紳鷹飽別敷浸无忌憚
邊臣戕賊居民塗炭據我鹽城喻口植幹繼逼海陵
恣爲泮奭璽書飛下皇威赫然聲罪致討忿激普天
許之節鉞副以金錢奮忠效命誰不爭先粵有世臣

虜使元帥羅致英才虢將雲會賈勇摧鋒前無堅對
逆全授首維陽城外昔平淮蔡惟斷成功至平澤潞
伐謀羣雄聖君賢相視昔則同山陽腥膻一洗而空
鉅姦伏誅殊方仰德鯨波不驚狼煙永息男耕女桑
四民安職玉燭旣調金甌可必聖君賢相益固本根
廣求民瘼博盡忠言屏除貪吏澄俗治源狂謀不起
國勢常尊一介微官嘗玷策府頌我君相或占古語
於萬斯年受天之祐錫公純嘏眉壽保魯

以上截江網

李方子

字公晦邵武人嘉定七年進士朱子高弟調泉

州觀察推官除國子學錄終辰州倅箬有禹貢
解等書

樵川郊行

避人忘井邑
耽靜步郊原
落葉風能掃
寒花霜更繁
山空樵響答
灘淺楫聲喧
願結山陽伴
長年共灌園

邵武府志

徐清叟 厲有

癸丑十月二日上天竺寺祈晴

金泥滑滑濺雕鞍
虔走禋祠謁宰官
積雨水添湖面闊
久陰雲護嶺頭寒
妨收是處田家苦
聞霽何時后

士乾現出日光須佛力少令憂國寸心寬

截江網

徐榮叟

字茂翁浦城人嘉定七年進士嘉熙中以集英殿修撰知靜江府兼經略安撫司始令永康以賑饑得民心累官資政殿大學士致仕卒謚文靜

贈常庵江羽士

曾跨金牛入帝鄉歸裝金殓富琳瑯喚回客枕邯鄲

夢澗草巖花亦自香

武夷山志

劉崇卿

福建晉江人嘉定七年進士官通判

勸農和江萬里韻

年來兵餉瘠吾農天遣仁侯作歲豐
燕寢晝清塵不到螺江春滿澤無窮
詩陶幽雅熙熙俗文續周書噩噩風
別乘自怜無錡地勸耕卻得到山中

截江網

鄭魏珽

江山人嘉定七年進士官浙江宣諭使著有卓

齋集

松風館

一壑蕭然萬里閒此身落得似雲閒
踟躕野鶴身同

逸來往樵人語不關
瑤草茂時春淡蕩
亂溪交處水潺湲
偶懷知己攜琴去
十里松風未出山

江山縣志

李遇

字用之號洞齋侯官人
嘉定七年進士真德秀
弟子累知績溪縣遷
監察御史改秘書少監
知朔州終于廣東運判

題濮村

乞與東風十日晴
放教杖屨步雲輕
客閑到處俱詩往
春色濃時載酒行
別去江山如識面
重來花鳥更關情
一官休羨無氈冷
官冷元來愈覺清

詠西湖江湖偉觀樓

舉目看來皆畫屏只因欄檻接蒼冥江湖二水一船
白吳越兩山相對青雲北雲南何處沒潮生潮落幾
時停西偏不被斜陽礙直見家山與洞庭

截江
網

江表祖

崇德人嘉定七年甲戌舉特科

題本緣軒

碧瓦丹稜轉盼成一亭聊復寄閒情人如水墨畫中
立山向煙蕪盡處橫舟入柳陰衝鷺去簷依波面陰
魚行題詩每愧臨流意吟苦那知白髮生

橋李
詩繫

林夔孫

字子式古田人嘉定七年特奏進士從朱子學
爲堂長官某縣尉著有書本義蒙谷集

資聖寺

華峰跨蒼穹下有雲一壑翬飛二百秋蜂巢幾千落
靈泉際空留宿霧臨除箔山呈萬古姿竹隕六月鐸
當年有賢令神交契冥漠懷哉精魄歸永矣香火託
至今書壁閒讀者爲嗟愕好事繼前志剏巖成此閣
仰看斗插椽俯聽泉入鐸晤言千載心英氣凜欲作
西崖望蒙頂躋攀計已昨忽聞良友同其寫襟期樂

遐登破嶸岬幽討待綽約磅礴富蒸鬱陰衣茫紛錯
再拜五華君許蒞他日約霜威淨餘氛晴宇洞寥廓

福州府志

陳範

字朝弼崇安人文公弟子本籍建陽居五夫里
舉嘉定七年進士授婺源尉秩滿遷丞崇仁偶
有疾自歎云倘來軒冕心無必見在詩書足自
娛遂歸隱里門不復出

臥龍潭

半晨欲墮潭渚深晝陽不到午陰陰洞簫一曲瑤笙

斷千山萬山雲水沉

武夷山志

李琪

字夢開嘉定八年以承議郎提舉浙東常平九年兼本路提刑十一年除禮部郎官

賑荒到天台有作二首

我亦田夫偶得官深知茅屋有飢寒紛然遮道呻吟狀一作同胞疾痛觀水際山陬多隱瘼風餐雨宿敢圖安破襦裹米皆王口粒粒當知帝澤寬

馳驅徒步問民飢似我寒儒負笈時偃仄荒村隨戶到蕭疎幾屋有烟炊平林帶暝投山驛蒼鬢衝寒濕

雨絲野老不知巡歷至相逢爾汝話家私

天台別編

陳夢建

字灼直嘉定八年黃巖縣令見赤城志

上喻史君重建霞起堂六首

丈人背日經行處草暗苔荒四十春誰倚高寒訪陳迹璇題寶墨一時新

酒酣步出玉霄降此去天關隔幾重霞佩頡頏風雨上清都只在嘿存中

詩社神交識迺翁耳孫凜凜有仙風青雲垂上斜飛去待要題詩遍浙東

玉泉天上古仙伯曾吏五雲書閣來寄語家人須候
我有時騎鶴過丹臺

樓觀微茫似積蘇一麾得傍化人居可能永日銷基
局且要蒙頭讀道書

天台別編

陳珪

長樂人嘉定十年特奏名十四年修職郎建康
府學教授十七年撰題名記

蛻龍洞

潛虬成穴古危岑曾爲編氓霈旱霖石怪自留千載
跡泥蟠難駐九天心老松猶學擎雲勢羣籟渾驚動

地吟瀟灑禪關連勝概追游誰不快煩襟

新城志

戴衍

字崇禮兗州人嘉定丁丑進士嘉熙元年十一

月以奉議郎知常熟縣事葺學修城開河濬濠

遷提轄左藏庫屯田員外郎遇元兵于高郵死

之

見曾偉
常熟志

桃源

源水不移當日岸桃花猶是昔年春

輿地紀勝
六十八

楊端叔

字子正江陰人嘉定丁丑進士官江東憲幹著

有自嬉集

浮遠堂

萬松相摩天籟作一塵不留心鏡空毋庸寶焰照牛渚已見浮涎吹龍宮零丁沙洲抗水勢替淚塔鈴語天風賈胡惜錢不自惜晝夜牙籌澎湃中

江陰縣志

羅必元

初名疊後改必元字亨父號北谷老人事迹詳

宋史本傳

案建康志北谷詩凡八見其稱北谷羅必元者七稱北谷羅疊者一則北

谷卽必元必元卽疊大經稱先君北谷老人蓋其父也

駐馬坡

一登偉觀眇山河下有將軍駐馬坡不是胷中兵十
萬長江天險誤人多

景定建
康志

秦淮

秦淮橫貫帝王州萬瓦鱗鱗枕碧流繫艇莫愁何處
去綠楊深巷有青樓

同上

賞心亭

勝地分明可賞心江山滿目飽登臨洛陽黯淡烟雲
遠多少英雄淚染襟

同上

新亭

五馬來時集宴游江山風景勿關愁合思戮力中原

語對泣何須作楚囚

同上

鳳凰臺

振衣快上鳳臺遊極目中原淚欲流慨歎興亡思太白永言眇邈憶齊邱烏衣已往人千古白鷺依然月一洲君子坐朝今在治重恢關洛不須愁

同上

周處臺

周處豪雄亦可人勇于遷善罕前聞區區未說除蛟虎一念中間舜蹠分

同上

雨花臺

蕭帝傾心向佛家謾言天女墜天花蘆僧一葉橫江

去回首梁園日脚斜

同上

北苑

烏衣池館一時新
晉宋齊梁舊主人
無處可尋王謝宅
落花啼鳥秣陵春

同上

金蓮步

金蓮佳麗不虛傳
浦浦荷花水上仙
未會與民同樂意
卻于宮裏看金蓮

同上

清涼寺竹

清涼世界竹如雲
舊日君王愛此君
時代改遷龍變化
荒山啼鳥不堪聞

同上

宋詩紀事補遺卷六十四終

男內閣中書樹屏校